

**PEMBERITAHUAN PERTANYAAN DEWAN RAKYAT**

**PERTANYAAN : BUKAN JAWAB LISAN**  
**DARIPADA : TUAN CHAN FOONG HIN [KOTA KINABALU]**

**SOALAN NO. 113**

Minta **MENTERI PERDAGANGAN ANTARABANGSA DAN INDUSTRI** menyatakan status Malaysia China Kuantan Industri Park mengikut pecahan tahun :

- (a) jumlah perbelanjaan Kerajaan Persekutuan dan negeri Pahang; dan
- (b) berapa syarikat beroperasi dan jumlah pelaburan dan peluang pekerjaan dan prestasi MCKIP berbanding dengan QinZhou China Malaysia Industri Park.

**JAWAPAN**

1. *Malaysia-China Kuantan Industrial Park* (MCKIP) telah dilancarkan secara rasmi pada 5 Februari 2013. Taman ini merupakan taman industri pertama di Malaysia yang dibangunkan bersama oleh Malaysia dan Republik Rakyat China (RRC). Berkonsepkan taman industri berkembar, *China-Malaysia Qinzhou Industrial Park* (CMQIP) pula merupakan taman industri di RRC. MCKIP turut merupakan taman industri pertama di Malaysia yang dianugerahkan status sebagai "Taman Industri Negara" atau "*National Industrial Park*".

2. Bersama-sama taman kembarnya iaitu *China-Malaysia Qinzhou Industrial Park* (CMQIP), kedua-dua taman ini adalah suatu mercu tanda keutamaan kerjasama pelaburan dua hala bagi memacu pembangunan sektor perindustrian kedua-dua negara.

3. Keluasan asal MCKIP yang hanya seluas 1,250 ekar, kini telah berkembang menjadi 3,500 ekar bagi menarik pelaburan-pelaburan yang berpotensi. MCKIP 1 yang berkeluasan 1,250 ekar telah

dibangunkan oleh syarikat pelabur iaitu Alliance Steel (M) Sdn. Bhd. dan juga syarikat pemaju Malaysia-China Kuantan Industrial Park Sdn. Bhd. (MCKIPSB) yang terdiri daripada usahasama konsortium Malaysia (51%) dan konsortium RRC (49%). Manakala MCKIP 2 dan MCKIP 3 akan dibangunkan oleh Asas Panorama Sdn. Bhd. yang merupakan sebuah syarikat usahasama antara syarikat Malaysia (60%) dan syarikat dari RRC (40%).

4. Selaras dengan inisiatif taman industri berkembar MCKIP dan CMQIP, Pelabuhan Kuantan dan Pelabuhan Qinzhou turut mewujudkan kerjasama sebagai pelabuhan berkembar (*sister ports*). Usaha ini bakal meletakkan Pelabuhan Kuantan sebagai pintu masuk ke rantau Asia Pasifik bagi para pelabur.

5. Pelabuhan Kuantan dibangunkan oleh Kuantan Port Consortium Sdn. Bhd. (KPC) yang terdiri daripada usahasama IJM Cooperation (60%) dan Guangxi Beibu Gulf International Port Group Co. Ltd. (40%). Jumlah nilai pelaburan oleh KPC bagi Pelabuhan Kuantan telah mencapai RM3 bilion.

### **Jumlah Perbelanjaan Kerajaan Persekutuan**

6. Dalam tempoh lima tahun dari 2013 hingga 2017, jumlah peruntukan dari Kerajaan Persekutuan bagi MCKIP adalah sebanyak RM147.6 juta untuk tujuan pembangunan infrastruktur asas seperti jalan raya dan sistem bekalan air. Nilai peruntukan mengikut pecahan tahun adalah seperti di **Lampiran I**.

7. Selain itu, sebanyak RM418 juta juga telah diperuntukkan bagi pembangunan infrastruktur asas yang menghubungkan MCKIP dengan kawasan Pelabuhan Kuantan.

### **Penglibatan Kerajaan Negeri Pahang**

8. Setakat ini, Kerajaan Negeri Pahang belum memperuntukkan sebarang dana bagi pembangunan MCKIP. Namun begitu, Kerajaan Negeri menunjukkan komitmen sebagai pemudahcara dalam urusan

pemilikan tanah. Tanah seluas 2,220 ekar telah diperuntukkan kepada kawasan MCKIP melalui syarikat berkaitan kerajaan negeri.

9. Kerajaan Negeri Pahang juga mempunyai pegangan saham 15% dalam Malaysia-China Kuantan Industrial Park Sdn. Bhd. (MCKIPSB) melalui Perbadanan Setiausaha Kerajaan Pahang (PSK) dan Perbadanan Kemajuan Negeri Pahang (PKNP).

### **Pelaburan di MCKIP**

10. Sejak tahun 2013 sehingga Februari 2019, jumlah pelaburan di MCKIP telah mencatat RM20.3 bilion dan dijangka mampu menjana 9,380 peluang pekerjaan. Pelabur pertama di MCKIP iaitu Alliance Steel (M) Sdn. Bhd telah bermula operasi secara berkala semenjak tahun 2018. Kini sebanyak 6 buah syarikat dalam proses pembinaan.

### **Pelaburan di CMQIP**

11. Bagi tempoh dari tahun 2011 sehingga Februari 2019, jumlah nilai pelaburan di CMQIP telah merekodkan RMB14.1 bilion dan sebanyak 8,200 peluang pekerjaan telah dijana. Kini sebanyak 16 syarikat telah melabur dan memulakan operasi perindustrian di CMQIP. Syarikat-syarikat ini terlibat dalam industri-industri seperti berikut:

- (i) Gelas;
- (ii) Kenderaan elektrik;
- (iii) Peralatan berteknologi pintar;
- (iv) Farmaseutikal;
- (v) Mikorba (*microbial*);
- (vi) Produk minyak sawit;
- (vii) Peralatan optikal;
- (viii) Robot; dan
- (ix) Sarang burung walit.

**LAMPIRAN I**

Peruntukan dari Kerajaan Persekutuan bagi MCKIP adalah seperti berikut:

<b>Tahun</b>	<b>Jumlah Peruntukan (RM juta)</b>
2013	30.0
2014	25.0
2015	16.9
2016	58.8
2017	16.9
2018	0.0
<b>JUMLAH</b>	<b>147.6</b>

*Sumber: Majlis Pembangunan Wilayah Ekonomi Pantai Timur (ECERDC)*